

Berist til:

Nefndarsvið Alþingis - Fjárlaganefndar, nefndasvid@althingi.is

Umsögn frá:

Félagi Íslenskra náttúrufræðinga (FÍN), fin@bhm.is

Reykjavík, 15. desember 2016

Umsögn um frumvarp til laga um breytingar á lögum um Lífeyrissjóð starfsmanna ríkisins, 6. mál á 146. löggjafarþingi.

Félag íslenskra náttúrufræðinga (FÍN) samþykkir ekki breytingar á lífeyriskerfi opinberra starfsmanna sem fela í sér skerðingu á réttindum eða kjörum núverandi eða framtíðar félagsmanna FÍN. FÍN leggur til að samningsaðilar byrji á réttum enda og vinni samhliða að samkomulagi um nýtt framtíðarlífeyriskerfi og launasetningu fyrir framtíðar starfsmenn ríkisins. FÍN telur það frumvarp sem nú liggur fyrir um breytingar á lögum um Lífeyrissjóð starfsmanna ríkisins skerða réttindi sjóðfélaga sem eiga aðild að A-deildum LSR og LSS auk þess sem það skerðir kjör og réttindi framtíðar sjóðfélaga deildanna.

Í umsögn þessari verður vísað til samkomulags frá 19. september sl. sem gert var á milli Bandalags háskólamanna (BHM), BSRB og Kennarasambands Íslands, annars vegar, og fjármála- og efnahagsráðherra og Sambands íslenskra sveitarfélaga, hins vegar, um breytingar á skipan lífeyrismála opinberra starfsmanna. FÍN tekur fram að félagið samþykkti ekki aðkomu BHM að samkomulaginu (sjá nánar í meðfylgjandi greinargerð) á sínum tíma og jafnframt lagði til að BHM myndi segja sig frá þessu samkomulagi.

Félagið vísar til athugasemda sinna sem það gerði við framlagningu sama máls (873) sem lagt var fram á síðasta (145) löggjafarþingi, en sú umsögn er hér meðfylgjandi.

Félagið vill hnykkja á eftirfarandi atriðum varðandi frumvarpið sem nú liggur fyrir:

Allir sjóðfélagar þurfa að vera tryggðir og jafn vel settir fyrir og eftir breytingu

Félagið telur einnig mikilvægt að það sé orðað skýrt í frumvarpinu og það tryggt að þeir sjóðfélagar sem nú eru í A-deild LSR og A-deild Brúar muni ekki hafa lakari réttindi, í framtíðinni, en þeir hefðu haft í núverandi kerfi, sbr. lög nr. 110/1997. Að tryggt sé í lögum að sjóðsstjórnnum LSR og Brú sé skylt að tryggja réttindi og að lífeyrisaukinn ásamt varúðarsjóði skuli standa undir þeim réttindum að fullu, þannig að sjóðfélagar séu jafn vel settir fyrir og eftir breytingu. Einnig er mikilvægt að skilgreining á sjóðfélaga sé skýr í lögnum og nái að öllu leyti utanum alla sjóðfélaga A-deilda.

Forsendur ábyrgðar varúðarsjóðsins verða að vera óbreyttar

Félagið gerir athugasemdir við þær breytingar sem gerðar hafa verið á 7. gr. lið C(X) í tölulið a. þar sem dregið hefur verið úr ábyrgð varúðarsjóðsins, þ.e.a.s. þeim forsendum sem þurfa að vera uppi svo varúðarsjóðurinn verði nýttur og leggur til sömu breytingar þar af lútandi eins og gerð var tillaga um í fyrri athugasemdum sínum vegna fyrra frumvarps.

Tryggja þarf rétt sjóðfélaga til að fara á milli vinnumarkaða og halda sjóðsaðild

Félagið telur mjög brýnt að í frumvarpinu séu sjóðfélögum í A-deildum tryggður réttur að A-deildum þegar sjóðfélaga fara á milli **vinnumarkaða**. Sjóðfélagar verða að geta haldið áfram að greiða í A-deild LSR eða LSS/Brúar skipti þeir um starf (fari af opinberum vinnumarkaði yfir á almenna markaðinn og

öfugt) að öðrum kosti er verið að loka opinbera starfsmenn inni hjá ríki og sveitarfélögum til æviloka ef horft er til lífeyrisréttindanna. Mikilvægt er að tryggja hreyfanleika á milli vinnumarkaða og því má ekki skerða rétt sjóðfélaga frá því sem nú er, en í núverandi kerfi er nú þegar hægt að fara á milli vinnumarkaða með auðveldum hætti og halda áfram aðild að A-deildum ef viðkomandi aðili uppfyllir skilyrði skv. 3. gr. núgildandi laga.

Lokaorð

Svo sátt geti orðið um breytingar á lífeyriskerfi opinberra starfsmanna þarf umrætt frumvarp að tryggja óskert réttindi sjóðfélaga sem eru aðilar að A-deildum LSR og LSS/Brú.

Þá þarf að tryggja að nýir sjóðfélagar hafi sambærileg launakjör og sjóðfélagar sambærilegra sjóða á almennum vinnumarkaði.

Það er krafa FÍN að ofangreindar breytingar verði gerðar á fyrirbyggjandi frumvarpi. Þannig telur félagið að hægt sé að koma í veg fyrir að sjóðfélagar í A-deildum beri skarðan hlut frá borði. Verði frumvarpið samþykkt óbreytt er það mat félagsins að mikill skaði hljóttist af bæði fyrir núverandi sjóðfélaga og framtíðar sjóðfélaga.

Þar sem félagið er ekki sátt við þann gjörning BHM að undirrita samkomulag um lífeyrismál opinberra starfsmanna óskar FÍN eftir að fá að koma fyrir fjárlaganefnd til að fara í gegnum ákveðin lyklatríði í umsögninni og svara spurningum nefndarmanna.

Virðingarfyllst,

f.h. Félags íslenskra náttúrufræðinga



Marianna H. Helgadóttir, formaður